

“Human sa Daghan nga Kalisdanan Moabut ang mga Panalangin” (D&P 58:4)

Ang Colesville Branch, lakip ni Polly Knight ug sa iyang anak nga si Newel, miabut sa Distrito sa Jackson, Missouri, sa saktong panahon aron makaapil sa pagpahinungod sa yuta sa Zion alang sa pagpundok sa mga Santos. Mihinumdom si Newel Knight:

“Sa ikaduhang adlaw sa Agosto, si Brother Joseph Smith Jr., ang Propeta sa Dios, mitabang sa Colesville Branch sa pagpahimutang sa unang troso isip pundasyon alang sa . . . Zion sa Lungsod sa Kaw, mga baynte ka kilometro sa kasadpan sa Independence. Ang troso gipas-an sa napulog duha ka mga lalaki, agi og pasidungog sa napulog duha ka mga tribo sa Israel. Sa samang higayon, pinaagi sa pag-ampo, ang yuta sa Zion gihalad ug gipahinungod ni Elder Sidney Rigdon alang sa pagpundok sa mga Santos. Usa gayud kini ka panahon sa kalipay ug kamaya alang sa mga Santos [kinsa] nakasaksi niini. . . .

“Sa ikatulong adlaw sa Agosto ang luna alang sa templo, medyo sa kasadpan sa . . . Independence, gipahinungod” (Newel Knight autobiography and journal, circa 1846–1847, Church History Library, Salt Lake City).

Ang mga anciano [elder] nga mitambong sa pagpahinungod adunay nagkalain-laing mga reaksyon sa kalihokan:

“Ang pipila sa mga anciano, sama ni Reynolds Cahoon, nakakita og makapahinam nga mga posibilidad niining simbolikanhon nga mga sinugdanan. ‘Didto ang akong mortal nga mga mata nakakita og mahinungdanon ug talagsaon nga mga butang,’ misulat siya, ‘nga wala ko magtuo nga makakita ako og sama niini dinhi sa kalibutan.’ Apan wala makadayeg si Ezra Booth sa gamay nga pagsugod. ‘Makapakuryuso’ kadto, miingon siya, ‘apan dili takus nga moadto og Missouri aron lang makita’” (Matthew McBride, “Ezra Booth and Isaac Morley,” sa *Revelations in Context*, ed. Matthew McBride ug James Goldberg [2016], 132–33, o history.lds.org).

Pagka-Agosto 7, upat ka adlaw human gipahinungod ang luna alang sa templo, namatay si Polly Knight. Ang iyang anak nga si Newel mihulagway sa mga kahimtang sa iyang kamatayon:

“Hilum siya nga nakatulog, diha sa kamatayon nagmaya sa bag-o ug walay katapusan nga pakigsaad sa ebanghelyo ug nagdayeg sa Dios nga nakakita pa siya sa yuta sa Zion ug nga ang iyang lawas mopahulay sa kalinaw, human sa iyang mga pag-antus tungod sa pagpanglutos sa mga dautan” (Newel Knight autobiography and journal, circa 1846–1847, Church History Library, Salt Lake City).

- Ngano kaha nga ang mga pagbati ni Polly Knight kalabut sa pagpahinungod sa yuta sa Zion lahi kaayo sa mga pagbati ni Ezra Booth?
- Unsa nga mga panalangin ang miabut kang Polly Knight tungod kay nagpabilin siyang matinud-anon panahon sa kalisdanan? (Tan-awa sa D&P 59:1–2, nga gipadayag sa Ginoo sa adlaw sa lubong ni Polly.)
- Unsa nga mga kasinatian ang nakatabang kaninyo nga mahibalo nga ang Ginoo mopanalangin niadtong magpabilin nga matinud-anon panahon sa kalisdanan?